




*Minggu, 31 Januari 2021*

**Ogen: Lukas 15:11-24**



**Ndatken dalam Mulih**



**M**egati si begi istilah labirin, sada gambaren perdalanen nggeluh si teptep wari. Labirin e banci igambarken bagi sada peta perdalanen bentukna kibul (melingkar) banci ka petak entah zigzag. Melala dalam si igambarken bas lingkaren e tapi sada ngenca dalam si banci ndarat bas labirin e nari. Emaka adi salah dalam banci lanai ndarat. Labirin e mere makna man banta maka wari-wari kegeluhen e desken perdalanen kiniteken, terus kita erdalam seh kari kita ndatken dalam mulih. Bas erkinitenken, lalap kita erjuang encidahken buah kiniteken arah perukuren, pengerana ras perbahanen. Megati la sidat serpang pulah bas perbeben e nari, tapi si dat tampukna maka Dibata ngasup mereken dalam pulah. E maka bas perdalanen kiniteken e la kita murah monce.

Mari si perdiatken perdalanen kegeluhen anak si nguda, si mindo erta warisen i bas bapana nari. Tuhu, i bas kalak Jahudi, lit bagin anak si nguda erta orangtuana tapi e iendesken adi lanai lit bapana. si perdiatken maka anak si nguda enda meseksek mindo gelah ibereken bana si jadi hakna amin je denga bapana. Kenca ialokenna baginna, lawes ia ku negeri si ndauh, i je erpoya-poya ras teman-temanna. La piga dekah keru kerina senna ndai, lanai lit si jadi temanna. Daramina dahin guna banci man, Jadi si mere nakan babi pe uekenna. Ban latihna ras serana akapna, dungna rukur ia, entah pangen mulih ku rumah bapa, lanai gia jadi anak jadi budak pe labo dalih gelah banci denga aku man. Ku akuken salahku man bapa gelah alokenna aku tading i rumahna.

Adi gambarken bas labirin ndai anak si nguda e sempat papak, salah dalam si ibentasinna e maka enggo erputar-putar bas labirin e seh latih akapna mesera pe geluhna. Tapi, bas paksa teneng, rukur ia, lit ukurna mulih ku rumah bapana, e ngatakensa datna denga dalam mulih. Megati kita pe salah dalam bas kegeluhen e, si akap enggo payo tapi reh dauhna ras dalam Tuhan. Adi enggo papak, uga pe latih naring, reh dauhna ras Tuhan, reh latihna ndalani kegeluhen. reh lanai si etehna erbahan mehuli. Perlu kundul kentisik, ngadi nerusken dalam si papak, rukur alu teneng, mulihlah ku dalam Tuhan.